

Pol-ate kaapiya tu yuuh la vu Timoti

1 ¹“Sa Pol, ond Anutu yoo ka vu be Yesu Kalisi holin sa be saatu sinaale, in nambe sa naanêl Anutu-te vakasin sen jôôy-ato langaah naambe yiyi naatu Yesu Kalisi-te hil, le mem Anutu le bu metumin vu yiyi.

²^bSate Timoti daka-e, sa kaavu kaapiyaa-jo laas vu hong. Aamangg Anutu yuuh yate Omaaho Bop Yesu Kalisi lambiing samu samu osin ka pasiv naas mando gaving hong-ambe galompayo nanjip melaas

Yaningg-ame naamum in banye nivasa le

³“Sa naalohak la vu Anutu sen sa navu sapa hôôk vaha osin sa longgpayo nikaapiik-ato, yik nambe sen sa bungg-aso sapa hôôk bôôy-ato, ond sa kangg navu hong hôôk lohakin langaah-ande busin-ambe sa naapêelis la vu Anutu. ⁴Tonde sa kangg vu sen gamem luk kaasêeh-ato, om sa naawiingin nambe anaas aange hong jesin naah-ambe mem sa kangg vasa dôôk. ⁵^dIn sa kangg vu nambe gawii-having osin galompayo timu nambe sen bumaavêeh Lois-ande tam Yunis-ato, tombe yik sa lak ni vanuh nambe gawii-having nambêênju having, ⁶^eondeey saawiingin nambe aambêel gakam ak in gakam bu Anutu-te niwêêk kul-ate sen bôôy sa hambe namangg ak galum-ambe lukalaas galompayôô-to. Om gêên-anjo gambiing kul ak Anutu-te niwêêk-anja be naatu bopaata jak, naambe sen hil dave hôôk kin-ambe natum bopaataa-to. ⁷^fIn Anutu vu Vavi Vaambuung vu yiyi ond me-nawiing in nambe yaanjêênin e, nganjo navu niwêêk vu yiyi, osin nawiing in nambe yahengg gaving omaahonôn-ambe yiyi oo anjakin yiyi nivasa mu.

⁸^gGame ganjêênin hil-ambe gambun yate Omaaho Bop-ate vakasin e, nganjo goo naanêl langaah. Tonde yik game ganjêênin hil-ambe onaatu kam in yite omaaho kalaambus sa le, malis, yik goo gako niwêêk

^a 1:1 Ep 1:1 ^b 1:2 1Ti 1:2 ^c 1:3 Pil 3:5; Sin 23:1; 24:16 ^d 1:5 Sin 16:1 ^e 1:6 1Ti 4:14
^f 1:7 Lom 8:15 ^g 1:8 Lom 1:16

vu Anutu be ombaaku nimeen in onaanêêl yite banye nivasa gaving sa. ^{9h}In Anutu hako yiyi lom-ambe teey yiyi in nambe yiyi naatu yite hil amu, lemu me-ka vu yate kul anivasa sen yiyi naawiiing ondeey teey yiyi e, malis, nganjo yoo ka vu be wiing samu samu vu yiyi nyemalis amu. Anutu me-hatung ngaanggis e de yoo wiing samu samuu-jo vu yiyi hôôk Yesu Kalisi munggin-ambe neep. ¹⁰ⁱTombe mem gêên Yesu Kalisi, omaaho sen hako yiyi lom-ato, tok laam langaah lung la, tombe Anutu taato yite samu samu sen vu vu yiyi ak Kalisii-to neep langaah. In Yesu Kalisi laanggôôl yimbin-ate niwêêk, de yite banye nivasa vêêl metumin sen yiyi mando danggataa-to laam langaah. ^{11j}Yik yii-ju yoo hatung sa be saatu sinaale osin kaputung in nambe sa naanêêl banye nivasa langaah, ¹²ondeey soo naaku nimeen. Lemu sa ningg-ame namum in e, malis, in soo alak omaaho sen saawii-having yii-jo ni lung la, tombe saawii-having vulôôt nambe yoo le ganggin yite kul ayuuu ame sen vu lukala sa namangg-anjo nivasa lôôt-ambe naatok na balup busin sen nom-ato.

^{13k}Om vakasin nivasa sen sa taahu hong hôôk-ato ond yik osapa hôôk, de goo gambiing gaving Yesu Kalisi niwêêk-ambe gahem gaving yi, in gatu yite va lung laa-to. ^{14l}Om goo naalum in va nivasa sen Anutu vu lukala onamam-ato be ongganggin nivasa, tonde Vavi Vaambuung sen nando hôôk yalonggpayôô-to ond yoo le dôôvu hong in kul-anjo.

^{15m}Galak ni nambe hil pin vu Esia, de Piselas ayuuu Hemosenis having, ond sil laluuh damind vu sa. ¹⁶Om sa naalohak in nambe Omaaho Bop aka pasiv in Onesipolas gaving vane be noondin, in busin ngeeyaata ond Onesipolas laam nayi sa be navu samu sa longgpayo, de me-nayêênin hil-ambe natu ka in sa in sen sa naaluus kalaambus-anjo le, malis. ¹⁷Nganjo naahen valup Lom atombe yoo salo sa pavis-ambe mem tovu sa, ¹⁸ⁿom Omaaho Bop aka pasiv in yi hôôk busin taamusin sen nom-ato. In Onesipolas-anjo ond yoo hôôvu sa balon ngeeyaata vu Epesas-ambe goo galak ni vanuh-ato.

Onaatu Yesu Kalisi-te omaaho vaavis anivasa

2 ¹Noongg-e, onggako niwêêk vu Yesu Kalisi-te samu samu sen navu vu yiyi-ato be onaatu omaaho niwêêk jak. ²De vakasin sen ohango saanêêl hôôk hil ngeeyaata mend-ato, ond yik otaahu vu hil anivasa vaalu sen sil lalohvu nambe taahu hil ango dôôk-ato.

^{3o}Ke, om goo naatu Yesu Kalisi-te omaaho vaavis anivasa, be ombaaku nimeen gaving hey vaalu. ⁴In vaavis-aso dala ngaamong ond me-dawiiing kul vaalu having e, malis, yik yoo dala ngaamong timu in nambe silate yêêv lanjji sil-ambe ahend anivasa vu sil. ^{5p}Tonde omaaho ti gatup-ambe kaluuh ango-

^h 1:9 Ep 2:8-9; Tit 3:5 ⁱ 1:10 1Ko 15:55-57; Hiblu 2:14 ^j 1:11 1Ti 2:7 ^k 1:13 1Ti 4:6; 6:3; Tit 1:9; 2:1 ^l 1:14 1Ti 6:20 ^m 1:15 2Ti 4:16 ⁿ 1:18 Jut 21 ^o 2:3 2Ti 1:8; 4:5
^p 2:5 2Ti 4:8

so, ond yoo gatup-ambe sapa hôök mopaatôôv hatupin nivalok, le naambe nama ond me-le gako nôôn anivasa ti le. ⁶“Tonde omaaho sen nawiing kul bopaata be naalôôh vanôôn-ato, ond yoo gako yite vanôôn nôôn vaalu sen nasupin-ato naamunggin hil vaalu pin, ond mem lohvu. ⁷Om gakam oo bu vakasin sen sa naanêêl-anjo, le mem Omaaho Bop e tatekin vu hong-ambe mem ganjak vakasin pin-anjo danggakook ani.

⁸“Ke, om gakam oo bu Yesu Kalisi sen yite danggakook neep vu Devit-ato, ond yimb-ambe kandi lak laah, lohvu sen sa naanêêl hôök banye nivasaa-to. ⁹“Tombe yik sa naanêêl banye nivasaa-jo ondeey sa naaku nimeen-ambe sil landuuh sa lohvu omaaho nipaya ti, lemu me-landuuh Anutu-te vakasin e. ¹⁰“Om sa longgpayo yoo niwêêk-ambe sa naaku nimeen pin-anjo in nambe saandôôvu hil sen Anutu yoo holin sil in nambe daatu yite hil-ato, tonde mem Yesu Kalisi gako sil naah vu Anutu be sil mando hôök yite nikaapulis danggata osin danggata.

¹¹“Om yik vakasin-anjo keen lôôt nambe,

“Yaavu yiyi la osin doos in nambe yaanggimb ak Kalisi haale, ond mem yale mando metumin gaving yi. ¹²“Om naambe yiyi baale niwêêk-ambe baaku nimeen pin, ond yik yale naatu lulemak gaving yi, le naambe yiyi naatu kangg in yi, ond yik le naatu ka in yiyi gaving. ¹³“De yiyi naanêêl naambe yamengg navu sapa yi, le ma de yiyi gavuuh yi na, nganjok yoo navu sapa hôök yite vakasin amu, de me-lohvu nambe kaange yite vakasin-anju le, malis lôôt.”

Onaatu Anutu-te kul vaha nivasa ti keen in nambe ji hong nivasa

¹⁴“Gambêêl hil alund jak in vakasin-anjo, be gambu kôôvu sil ak Anutu haale naambe sil-ame mahôôh sil lôôt in vakasin vaalu le, in vakasin mahôôs in ond me-lohvu nambe dôôvu omaaho ti le, malis, nganjo nawiing nipaya vu hil sen dando dangoyin-ato mu. ¹⁵“Om goo gambiing kul aniwêêk in nambe mem Anutu ji hong nivasa naambe gatu kul vaha nivasa ti keen-ambe onanêêl yite vakasin keen-ato nivalok, de ganim-ame namum in e. ¹⁶“Tonde goo ganoh nanye in vakasin mali-malis vaha vaha sen nôôn maa-to, in vakasin mali-malis nambêênjo ond le naanggiy hil-ambe mem landukana mop sen galuuh damind vu Anutuu-to.

¹⁷“Tombe silate vakasin mali-malis-anju lohvu payêês bopaata sen naya hôök omaahonôôn vahand in naatu bopaata jak lôôt-ambe la nalohvu omaahonôôn pin. Ke, hil-anju silate omaaho yuuh ond Haimenias ayuuh Pailitas. ¹⁸Hil-anju ond daloh paya in vakasin keen-ato om danêêl nambe yiyi kandi lak lung la de yame le kandi jak naah vu taamusin e. Ke,

^a 2:6 1Ko 9:7,10 ^r 2:8 1Ko 15:4,20; Lom 1:3 ^s 2:9 Ep 3:1; Pil 1:12-14 ^t 2:10 Ep 3:13;

Kol 1:24 ^u 2:11 2Ko 4:11 ^v 2:12 Mat 10:33 ^w 2:13 Lom 3:3-4; Nam 23:19; Tit 1:2

^x 2:14 1Ti 6:4; Tit 3:9 ^y 2:15 1Ti 4:6; Tit 2:7-8 ^z 2:16 1Ti 4:7 ^a 2:17 1Ti 1:20

danêêl nambêênjo tombe nawiing nindanjeen vu hil vaalu sen lawii-having vakasin keen-ato.

¹⁹^bLemu Anutu-te hil bel-ate ond sil lalohvu ngaandiin aniwêêk sen Anutu haav-ambe naale lung laa-to, tombe ngaandiin-anju kaavu vakasin neep ak nambe, “Omaaho Bop yoo lak yite hil anind.” Tonde ango neep having nambe, “Hil pin sen danêêl nambe Omaaho Bop-ate hil sil-ato ond sil oo galuuh damind vu va nipaya.”

²⁰^cIn bayêên bop ti ond dêêngg ayuuh kaambum nando hôôk, tonde vaalu ond sil samu lak gool osin siliva, de vaalu ond sil lasap haah, tonde sil langgi heey ak ngaanggis, tombe vaalu ond kul anivasa-te, de vaaluk kul mali-malis-ate. ²¹^dOm naambe omaaho ti galuuh dami vu hil-anju osin silate vakasin tatuhin de mando nivasa, ond le mando naambe kaambum sen kul anivasa keen-atêêto, in tu vaambuung-ambe nando in nambe yite omaaho bop biing kul anivasa pin jak yi.

²²^eOm goo napak in kakook anipaya sen nalup maanggêêm-aso londpayô-to, tonde goo mosapa hôôk va nivalok osin gambiing gaving, de gahem gaving hil osin galompayo naalum melaas gaving hil sen londpayo la vu Omaaho Bop timu be lavand nahôôk yii-to. ²³^fTonde onggaluuh damim vu vakasin sen nôôn ma be hil sen lundkook ma danêêl sil in-ato, in galak ni nambe vakasin nambêênja natu ngaamong vu hil. ²⁴^gDe Omaaho Bop-ate kul vaha-so ond ti me-mahôôh hil in vakasin e, nganjo yoo biing va melaas amu vu hil pin, yik yoo taahu hil hôôk va nivasa mu, de me-ahekalin-ambe bu dôôk hil-ate nipaya sen lawiing yi payaa-to nyevahaan e. ²⁵^hDe naanêêl kalêêsin ambu-so ond naanêêl sil osin melaas. Ke, mak biing naambêênjo ond Anutu le dôôvu sil, tombe sil langgilin sil alondpayo be mem lanjakk vakasin keen ani. ²⁶ⁱIn bôôy ond Saalang hako sil hôôk yite govak in nambe sil oo monggatung nanyend in Saalang lava, le naambe lanjakk vakasin keen ani, ond sil alundkook e biing kul anivasa jesin naah atombe mem sil gavuuu Saalang-ate govak na.

Busin ahus ond va nipaya ngeeyaata le naatok naam

3 ¹^jGoo ganjak vakasin-anjo ni naambe vu busin taamusin ond nimeen ngeeyaata lôôt e naatok naam. ²^kTombe omaaho ti ti ahe yoo le gaving yi, tonde ahend e gaving mone lôôt, tombe sil oo le gako sil haalend jak, osin sil gatee sil jak danjeen-ambe daanêêl hil pale, de sil e kalêêh maandin ayuuh taandin lavand. Sil-ame le daapêêlis vu hil sen davu samu sil-ato le, nganjo sil e lanji va nivasa yuuh ame naambe va

^b 2:19 Nam 16:5,26; Jon 10:14; 1Ko 8:3; Ais 52:11 ^c 2:20 1Ko 3:12 ^d 2:21 2Ti 3:17

^e 2:22 1Ti 6:11 ^f 2:23 1Ti 4:7 ^g 2:24 1Ti 3:3; Tit 1:7 ^h 2:25 1Ti 2:4 ⁱ 3:1 1Ti 4:1

^j 3:2 Lom 1:29-31

malis. ³Sil ahend-ame le gaving halindin-aso noondin-aso daka le, de sil ahend-ame le naakuuh daka le, malis, yik sil e daanêel vakasin anipaya jak hil noh nanye, tonde sil-ame lalohvu nambe me-le lanjakin sil daka le, nganjo yoo le lambiing navu dees vu hil lôôt, osin le lanji va nivasa pin paya. ⁴Tonde le lambu halindin landukana vaavis namand in nambe lanyis, de pavis atombe sil lambiing va nindanjeen, tonde sil e gatee sil jak naambe sil bop, osin ahend oo le gaving liiy vaha vaha voon-ate, de ahend-ame le gaving Anutu daka le. ⁵^kSil e kaasiy sil naavind ak Anutu-te vakasin malis amu, lemu sil-ame lawii-having yite niwêêk e. Hil-anja ond goo ganoh nanye in sil.

⁶^lHil-anja sil vaalu dasengg-ambe dalakala bayêên vu vêêh sen lundkook maa-to be dalu sil nalund ak vakasin tatuhin. Vêêh-asôônju ond va nipaya ngeeyaata nawiing-ambe sil alondpayo nimeen, tombe kakook vaha vaha naanjiihin sil having. ⁷^mVêêh-asôônju yoo mondango vakasin amu, lemu sil-ame lalohvu nambe lanjak vakasin keen ani le. ⁸ⁿBôôy ond Janis ayuuh Jamblis dawiingin nambe daanggôôl Mose, om yik hil sen-anja ond dawiingin nambe daanggôôl vakasin keen. Sil alundkook la paya lung la, tonde sil-ame lalohvu vakasin keen sen yaawii-having-ato daka le, malis lôôt. ⁹Lemu hil ngeeyaata me-le lambiing gaving sil e, malis. Yik hil pin e lanji hil-anju dawiing va osin lundkook ma, naambe sen bôôy hil layi Janis ayuuh Jamblis lawiing va osin yuuh alundkook maa-to.

Gamem oo sapa Anutu-te vakasin

¹⁰Lemu hong ond gahem having sa be galak sate vakasin ani sen sa navu tatekin vu hil-anjuuto lung la, osin va pin sen sa naawiing-ato, tonde mopaatôôv sen sa navu sapaa-to, osin va sen soo aawii-having Anutu niwêêk-ato, tombe same ahekalin pavi-pavis e, nganjo soo naawiing kul vu hil lôôt. Tonde galak sa ningg nambe sahengg oo naving hil osin soo naale niwêêk-ambe naaku nimeen. ¹¹^oTonde va nindanjeen pin sen hil dawiing vu sa osin nimeen pin sen tovu saa-to, tonde va sen tovu sa neep Antiok-ande Ikoniam osin vu Listlaa-to ond yik galak ni nambe hil lawiing nindanjeen vu sa lôôt vuu-ju, lemu Omaaho Bop oo lôôh sa vêêl in nimeen pin-anju. ¹²^pKeen, hil pin sen lawiingin nambe lanjalak Yesu Kalisi be lambiing va sapa Anutu kaa-to, ond omaahonôôn e lambiing nindanjeen vu sil. ¹³Tonde hil anipaya osin tatuhin ambu-so le tatuhin hil, de sim Saalang oo

le tatuhin hil anipaya-sôônju, tombe mem sil pin daatu hil anipaya valok-ate.

^k 3:5 Mat 7:15,21; Lom 2:19-20; Tit 1:16 ^l 3:6 Tit 1:11 ^m 3:7 2Ti 2:25 ⁿ 3:8 Eks 7:11,22; 1Ti 6:5 ^o 3:11 Sin 13:50; 14:5,19; Saam 34:19 ^p 3:12 Mat 16:24; Jon 15:20; Sin 14:22

¹⁴ ^qLemu hong ond gamem oo sapa vakasin sen ohango be gawii-having niwêêk-ato, in hey sen hey taahu hong-ato ond galak hey aningg lung la. ¹⁵ ^rTonde galak ni having nambe bôôy sen goo naahen unoopasiv-ato, ond goo monangoyin vakasin hôôk Anutu-te kaapiya be galak ni, tombe kaapiyaa-ju lohvu nambe naanggiy hong-ambe onaatokak mopaatôôv sen galompayo na timu vu Yesu Kalisi in nambe mem Anutu gako hong naah vu yii-to.

¹⁶ ^sYik Anutu-te vakasin pin sen lukaneep kaapiyaa-to ond Anutu yoo vu vu hil-ambe sil kaavu, tombe vakasin-anjo ond nivasa lôôt in nambe tatekin vakasin keen vu yiiy, tonde taato yate va nipaya vu yiiy, osin naanggiy yiiy dukanaah Anutu-te mop, tonde taahu yiiy hôôk va nivalok. ¹⁷ ^tOm mem yiiy sen yaatu Anutu-te hil-ato, ond yiiy oo aatu hil aniwêêk lung la be yaalohvu lôôt in nambe yaambiing kul anivasa pin.

Goo naanêêl Anutu-te vakasin keen-ato niwêêk lôôt

4 ¹ ^uYesu Kalisi le gangoyin hil sen dando memoos osin hil sen layimb-ato silate vakasin pin. Yesu Kalisii-ju le naatok naam hil pin amend-ambe mem naatu omaaho lulemak-ambe ganggin yite va pin mando danggata osin danggata. Om sa naanêêl niwêêk vu hong jak Anutu yuuh Yesu Kalisii-ju haalend naambe ² ^vgoo monaanêêl yite tanasin langaah. Naambe hil lawiingin nambe gangoyin ond onaanêêl, le naambe me-lawiingin nambe gangoyin e, lemu yik goo monaanêêl Yesu Kalisi-te vakasin lôôt. Goo naanêêl lôôt in nambe lambiing gaving, osin gambu kôôvu hil in nambe vakasin galu sil alondpayo be langgilin sil, tonde okaandu hil ak vakasin gaving. De game ganitambo osin game gahekalin e, nganjo goo gambiing kul-anjo vu hil lôôt osin otaahu sil nivasa.

³ ^wAnge, vu taamusin ond hil-ame le gambe nanyend in vakasin anivasa keen-ato daka le, malis, yik sil nanyend e biing navu navu in nambe sil gango vakasin heey, tombe sil e langgolin silate kaputung heey in taahu sil hôôk va vaalu sen dawiiingin-ato. ⁴ ^xTombe mem sil galuuh damind vu vakasin keen-ande gatung nanyend in vakasin vaha vaha mali-malis. ⁵ Lemu hong ond nohvu busin pin galumkook oo biing kul anivasa, goo baaku nimeen-ambe onaanêêl banye nivasa vu hil. Tonde yik kul pin sen Anutu vu vu hong-ato, ond goo gambiing keen lôôt.

Pol nêêl nambe ngaaho lak in yite kul navu jung na

⁶ ^yGêên saatu salivangin vu Anutu nambe sen hil datooy wain natu salivangin vu Anutuu-to. In busin sen sa navu gavuu kul-ande sana

^q 3:14 2Ti 2:2 ^r 3:15 Jon 5:39 ^s 3:16 Lom 15:4; 2Pi 1:21 ^t 3:17 2Ti 2:21

^u 4:1 Sin 10:42; Lom 14:9-10 ^v 4:2 Sin 20:20,31 ^w 4:3 1Ti 4:1; 2Ti 1:13 ^x 4:4 1Ti 4:7

^y 4:6 Pil 2:17

lak-ato ngaaho lak lung la. ^{7z}In soo monatup niwêêk lôôt-ambe mem gêên saatok valup nalu daambuuh-to lung la. Yik soo aawii-having niwêêk. ^{8a}Gêên Omaaho Bop hatung nôôn anivasa sen hil anivalok-atêeto be nando nanggin sa, in yi omaaho sen yoo nangoyin vakasin-ambe nanêel nivalok, tombe busin-anju ond yoo le bu nôôn anivasaa-ju vu sa, lemu me-yoo le bu vu soo timu le, nganjo le bu vu hil pin sen ahend having nambe lanji yi dôôk busin sen naatok naam langaah-ato.

Vakasin ahus heey

^{9b}Yik goo kandi be ganaam vu sa pavis,

^{10c}In Demas havuuh sa de la Tesalonika in ahe yoo naving va voon-ate, tonde Klesens la Galata, de Titus la Dalmesia. ^{11d}Tonde yik Luk nôôn timu yoo nando having sa, om onggako Maak gaving hong-ambe manaam ond mem nivasa in nambe dôôvu sa in kul. ^{12e}Saawiing Tikikas la Epesas lung la.

^{13f}Ke, om ganaam ond onggako sate lolop diin sen sa havuuh nando Kapas ambaan vu Toloas-ato be onggako kaapiya gaving. Tonde kaapiya vaalu sen sil samu lak bik naavii-to ond manyinja goo gako naam keen.

^{14g}De Aleksanda sen nawiing kul in nasi kaapaa-to ond wiing sa paya lôôt, om sim taamusin e Omaaho Bop e bu yite nipaya nyevahaan dukanaah va sen wiing-ato. ¹⁵Om yik goo ganggin hong in omaahô-ju, in yoo naanggôl heyate vakasin lôôt.

^{16h}Tombe nyendoos ond soo timu be saanêel vakasin laah vu hil sen dango sate vakasin-ato, de omaaho ti me-naale having sa be hôôvu sa le, malis, hil pin lavuuh sa, om saalohak in nambe Anutu me-ka bu silate nipayaa-ju le. ¹⁷ⁱLemu sak, Omaaho Bop kaandu sa be vu niwêêk vu sa, ondeey soo aanêel Kalisi-te vakasin lohvu lôôt vu hil sen dango sate vakasin-ato, be hil alundoos pin langoyin. Tonde Anutu yoo lôôh sa vêel in omaaho nipaya

nama. ¹⁸Tonde yik Omaaho Bop yoo le nôôh sa vêel in va nipaya pin sen hil dawiingin nambe lambiing vu saa-to, de yoo le ganggin sa be gako sa naah baan baandoni. Ond yik Omaaho Bop-anju yite nikaapulil naatu bopaata lôôt-ambe nanjip danggata osin danggata. Keen.

^{19j}Ke, de onaanêel vu Pliska yuuh laya Akwila, tonde vu Onesipolas-aso yite hil gaving naambe sa kangg navu sil. ^{20k}De Elastas ond haay hatô Kolint atombe naahen nandô-ju, tonde Tolopimas ond nilak om nando Mailitas-ande sa laam. ²¹Om okandi be ganaam pavis, de game

^z 4:7 1Ti 6:12 ^a 4:8 1Ko 9:24-25; Taata 2:10 ^b 4:9 2Ti 1:4 ^c 4:10 Kol 4:14; Tit 1:4
^d 4:11 Kol 4:14; Sin 15:37-39 ^e 4:12 Ep 6:21-22 ^f 4:13 Sin 20:6 ^g 4:14 1Ti 1:20;
 Saam 62:12; Pro 24:12; Lom 2:6 ^h 4:16 2Ti 1:15 ⁱ 4:17 Sin 23:11; 27:23; Dan 6:22
^j 4:19 Sin 18:2; 2Ti 1:16-17 ^k 4:20 Sin 19:22; 20:4

mongganggin busin sen vavi osin lôôy anipayaa-to le. Ke, Yubulas ayuuh
Pudens-ande Lainas ayuuh vêêh bop Klodia, tonde yik Yesu-te hil pin
having ond kand navu hong.

²²Yik vakasin lung laa-ja. Omaaho Bop mando gaving okanum, de yite
samu samu naas mando gaving ham pin.